



HRD CORP TERIMA KUNJUNGAN MENTERI DARI UNITED KINGDOM ERAT KERJASAMA MALAYSIA-UK DALAM PEMBANGUNAN TENAGA KERJA

KUALA LUMPUR, 6 Ogos 2025 – Human Resource Development Corporation (HRD Corp) telah menerima kunjungan hormat daripada Yang Amat Berhormat Baroness Smith of Malvern, Menteri Kemahiran merangkap Menteri Wanita dan Kesaksamaan, Jabatan Pendidikan, United Kingdom (UK) ke Ibu Pejabat HRD Corp di Bukit Damansara pada 31 Julai 2025 sebagai sebahagian daripada lawatan rasmi beliau ke Malaysia.

Yang Amat Berhormat Baroness Smith of Malvern diiringi oleh Tuan Yang Terutama Ajay Sharma, Pesuruhjaya Tinggi British ke Malaysia telah disambut oleh Yang Berhormat Dr. Kelvin Yii Lee Wuen, Setiausaha Politik kepada Menteri Sumber Manusia; Datuk Abu Huraira bin Abu Yazid, Pengerusi HRD Corp dan Dr. Syed Alwi bin Mohamed Sultan, Ketua Eksekutif HRD Corp.

Pertemuan ini menjadi platform kepada kedua-dua negara untuk meneroka potensi kerjasama dua hala dan perkongsian maklumat mengenai inisiatif Malaysia dalam bidang latihan kemahiran, pembangunan tenaga kerja dan bakat tempatan serta perkembangan terkini UK dalam bidang yang sama.

Dalam masa yang sama, pertemuan itu turut menonjolkan peranan Kementerian Sumber Manusia (KESUMA), Malaysia, melalui HRD Corp sebagai agensinya, dalam menganjurkan Tahun Kemahiran ASEAN (ASEAN Year of Skills – AYOS) 2025, sebuah inisiatif bersempena dengan Kepengerusian ASEAN oleh Malaysia.

Datuk Abu Huraira bin Abu Yazid menekankan kepentingan sesi libat urus tersebut.

“Lawatan ini bukan sahaja mengeratkan hubungan dua hala tetapi turut mengukuhkan hasrat bersama untuk memacu kerjasama antarabangsa yang bermakna di bawah Kepengerusian ASEAN oleh Malaysia.”

UNTUK SIARAN SEGERA

Datuk Abu Huraira turut berkongsi bahawa HRD Corp kini sedang menyelaraskan tujuh (7) platform utama di bawah AYOS 2025 yang memfokus kepada pembangunan kemahiran peringkat tinggi, termasuk Forum Kemahiran Global (Global Skills Forum – GSF) yang bakal diadakan pada bulan Oktober, anjuran bersama Pertubuhan Buruh Antarabangsa (ILO) dengan sokongan Sekretariat ASEAN.

“GSF menawarkan peluang besar untuk memajukan perbincangan global berkenaan transformasi kemahiran dan kami amat mengalu-alukan penyertaan rakan antarabangsa, termasuk UK, bagi menjayakannya”, ujar beliau.

Dr. Syed Alwi bin Mohamed Sultan pula penyifatkan pertemuan ini sebagai cerminan bersama Malaysia dan UK untuk membina tenaga kerja yang berdaya tahan, dinamik dan bersedia menghadapi masa hadapan.

“Perjumpaan ini merupakan komitmen kami untuk memperkukuh kerjasama antara kedua-dua negara dalam bidang pendidikan, pembangunan bakat dan Inovasi. Semua ini penting untuk bersaing dalam ekonomi global yang semakin mencabar dan pantas berubah.”

KESUMA turut diwakili oleh Raja Nizam bin Raja Kamarulbahrain, Setiausaha Bahagian Antarabangsa, manakala barisan kepimpinan kanan HRD Corp hadir untuk menyokong sesi ini.

Yang Amat Berhormat Baroness Smith turut disertai oleh delegasi yang terdiri daripada Dr. Faye Taylor, Timbalan Pengarah Strategi, Jabatan Pendidikan UK; Hannah Deighan, Setiausaha Sulit kepada Yang Berhormat Baroness Smith; Izza Ismail, Penasihat Serantau Pendidikan dan Kemahiran, Pejabat Luar, Komanwel & Pembangunan, Suruhanjaya Tinggi British Kuala Lumpur; Min Mahayuddin, Pengurus Kanan Perdagangan, Suruhanjaya Tinggi British Kuala Lumpur serta Prabha Sundram, British Council Malaysia.

-Tamat-

UNTUK SIARAN SEGERA

Mengenai HRD Corp

Human Resource Development Corporation (HRD Corp) ditubuhkan pada tahun 1993 dengan dikenali sebagai Majlis Pembangunan Sumber Manusia (MPSM). Ia kemudian diperbadankan menjadi Pembangunan Sumber Manusia Berhad pada melalui penggubalan Akta Pembangunan Sumber Manusia Berhad 2001.

Sebagai sebuah agensi di bawah Kementerian Sumber Manusia, HRD Corp bertanggungjawab terhadap pungutan levi dari industri utama serta pengeluaran geran latihan melalui mekanik dalamannya yang dikenali sebagai Kumpulan Wang Pembangunan Sumber Manusia (KWPSM) atau Human Resources Development Fund (HRDF).

Pada April 2021, HRDF telah dijenamakan semula kepada HRD Corp. Perubahan nama ini adalah cerminan tanggungjawab, arah dan misi organisasi yang baharu. Ini termasuk memperluas usaha peningkatan kemahiran dan kemahiran semula pekerja kepada semua majikan dan individu warga Malaysia; di samping memberi peluang menjana pendapatan kepada semua komuniti yang memerlukan. Transformasi ini sejajar dengan cita-cita HRD Corp untuk memacu aspirasi pengembangan bakat tempatan untuk jangka panjang.

Untuk maklumat lanjut, sila layari – www.hrdcorp.gov.my.